



UKA 2017/107
03. oktober 2017
Debora Kleist

Kalaallit Nunaata nunap immikkoortuinut kommuneqarfinnullu aggorneqarnera pillugu Inatsisartut inatsisaat nr. xx,xx.xxx 2017-imeersoq

(Kommuninut, Nunaqarfinnut, Isorliunerusunut, Attaveqarnermut Ineqarnermullu Naalakkersuisunut ilaasortaq)

Kalaallit Nunaata nunap immikkoortuinut kommuneqarfinnullu aggorneqarnera pillugu Inatsisartut inatsisissaatut siunnersuummut imaattumik Inuit Ataqatigiinnit oqaaseqaateqassaagut.

Suliassami matumani nunatsinni kommunit sisamaasut ilaaniit tassa Qaasuitsup Kommuniani inuttaasunik taasititsisoqarmat amerlanerussuteqartut kissaatigigaat kommunip avinneqarnissaanut isumaqataallutik taasinerikkut.

Tamatumalu kinguneraa 2016-imi Qaasuitsup Kommuniani kommunalbestyrelsimi ilaasortat isumaqatigiittup Naalakkersuisunut saaffiginnissutigaat, Qaasuitsup Kommuniata marlunnut avinneqassasoq, ukulu illoqarfittut siunnerfigineqarput: Ilulissat, Uummannaq, Upernavik Qaanaarlu tassaalersoq Avannaata Kommunian kiisalu Aasiaat, Qasigiannuit, Qeqertarsuaq aammalu Kangaatsiaq, tassaalersoq Kommune Qeqertalik.

Suliap ingerlanneqarnerani nunatsinni kommunit kiisalu kommuninngortussat nutaat nammineq ilusilersueqataaffigisaat tamatut isikkoqartillugu akuersaarparput.

Taamatut oqaaseqarluta Kalaallit Nunatta nunap immikkoortuinut kommuneqarfiillu aggorneqarnera pillugu siunnersuut akuersaarparput, aappassaneerneqartinnagulu ataatsimiititaliamut susasaqartumut inassutigalutigu.